

四庫全書

集部

欽定四庫全書

集部
才調集卷九

詳校官中書臣陸湘

助教臣常循覆勘

覆校官中書臣汪師曾

校對官原任典簿臣郭祚熾

膳錄監生臣朱增

欽定四庫全書

才調集卷九目錄

劉商 一首

秋夜聽嚴紳巴童唱竹枝歌

長孫佐輔 二首

尋山家

南中客舍對雨送故人歸北

朱倣 二首

秣陵送客入京

江上送別

王表 二首

清明日登城春望寄大夫使君

成德樂

張安石 二首

玉女詞

苦別

張謩一首

還京

于濬三首

古宴曲

思歸引

苦辛吟

胡曾九首

寒食都門作

薄命妾

獨不見

交河塞下曲

車遙遙

早發潛水驛謁郎中員外

贈漁者

自嶺下泛鷁到清遠峽作

題周瑜將軍廟

李羣玉 二首

同鄭相并歌姬小飲因以贈

戲贈姬人賦尖字韻

顧非熊 一首

秋日陝州道中作

袁不約 二首

長安夜遊

病宮人 重刪
去

吳商浩 八首

巫峽聽猿

秋塘曉望

水樓感事

長安春贈友人

宿山驛

塞上即事

北邙山

泊舟

梁鎰 一首

代征人妻喜夫還

賀知章 一首

詠柳

張蠡 四首

錢塘夜宴留別郡守

長安春望

敘懷

題嘉陵驛

劉象

七首

春夜

又

曉登迎春閣

早春池亭獨遊

又

又

白髭

戴司顏 二首

江上雨

塞上

沈彬 一首

秋日

李賀 一首

七夕

嚴維一首

秋夜船行

韓翃一首

寒食

熊皦一首

早梅

張喬三首

楊花落

送友人歸宜春

送進士許棠

陳陶
一首

寄兵部任畹郎中

張謂
一首

杜侍御送貢物戲贈

鄭常
一首

寄邢逸人

崔峒 一首

題崇福寺禪院

李洞 一首

喜鸞公自蜀歸

李端 一首

巫山高和皇甫拾遺

一 江為一首

江行

裴度一首

中書即事

陳上美一首

咸陽懷古

姚合七首

遊宣義池亭

遊陽河岍

邊詞

又

寄王度居士

寄王玄伯

聞蟬

楊牢 一首

贈舍弟

王昌齡 二首

出塞

少年行

于鵠
二首

送唐大夫讓節歸山

送宮人入道

陳羽
一首

冬晚送友人使西蕃

僧貫休
三首

野田黃雀行

夜夜曲

行路難

僧尚顏
二首

秋夜吟

贈村公

僧護國
一首

許州趙使君孩子

僧棲白 二首

八月十五夜月

哭劉得仁

僧無可 二首

金州陪姚員外遊南池

夏日送田中丞赴蔡州

僧清江 一首

贈淮西賈兵馬使

僧法照 一首

寄錢郎中

僧太易 二首

贈司空拾遺

宿天柱觀

僧惟審 一首

賦得聞黃鳥啼

僧滄浩 一首

留別嘉興知己

僧皎然 二首

訓崔侍御見贈

尋陸鴻漸不遇

僧無本 二首

行次漢上

馬嵬

欽定四庫全書

才調集卷九

唐 韋穀 撰

劉商 一首

秋夜聽巖紳巴童唱竹枝歌

巴人遠從荆江客回首荆山楚雲隔思歸夜唱竹枝歌
庭槐葉落秋風多曲中歷歷敘鄉思鄉思綿綿楚詞古
身騎吳牛不畏虎手提蓑笠欺風雨猿啼日暮江岸邊
綠蕪連山水連天來時十三今十五一成新衣已再補

鴻雁南飛報鄰伍在家歡樂辭家苦天晴露白鐘漏遲
淚痕滿面看竹枝曲終寒竹風裊裊西方日落東方曉

長孫佐輔 二首

尋山家

獨訪山家歇還涉茅屋斜連隔松葉主人聞語未開門
繞籬野菜飛黃蝶

南中客舍對雨送故人歸北

猿聲啾啾雁聲苦卷簾相對愁不語幾年客吳君在楚

況送君歸我猶阻家書作得不忍封北風吹斷階前雨

朱倣 二首

秣陵送客入京

秣陵春已至君去學歸鴻綠水琴聲切青袍草色同鳥
喧金谷樹花落夕陽宮日日相思處江邊楊柳風

江上送別

浦邊新見柳搖時北客相逢只自悲惆悵空知思後會
艱難不敢料前期行看漢月愁征戰共折江花怨別離

向夕孤城分首處寂寥橫笛為君吹

王表 二首

清明日登城春望寄大夫使君

春城閒望愛晴天何處風光不眼前
寒食花開千樹雪清明日出萬家煙
興來促席唯同舍醉後狂歌盡少年
聞說鶯啼却惆悵詩成不見謝臨川

成德樂

趙女乘春上畫樓一聲歌發滿城秋
無端更唱關山曲

不是征人亦淚流

張安石 二首

玉女詞

綺薦銀屏空積塵
柳眉桃臉暗銷春
不須更學陽臺女
為雨為雲趁惱人

苦別

向前不信別離苦
而今自到別離處
兩行粉淚紅闌干
一朵芙蓉帶殘露

張謩一首

還京

朱紱臨秦苑皇華赴洛橋
文章南渡越書奏北歸朝樹
入江雲盡城銜海月遙
秋風將客思川上晚蕭蕭

于濬三首

古宴曲

雉扇合蓬萊朝車回紫陌
重門集嘶馬言宴金張宅
燕娥奉卮酒低鬟若無力
十戶手胼胝鳳皇釵一隻
高樓

齊下視日照羅衣色笑指負薪人不信生中國

思歸引

不畊南畝田為愛東堂桂身同樹上花一落又經歲交
親日相薄知己恩潛替日開十二門自是無歸計

苦辛吟

壠上扶犁兒手種腹長飢窗下擲梭女手織身無衣我
願燕趙姝化為嫫母姿一笑不直錢自然家國肥

胡曾九首

寒食都門作

二年寒食住京華
寓目春風萬萬家
金絡馬銜原上草
玉顏人折路傍花
軒車競出紅塵合
冠蓋爭回白日斜
誰念都門兩行淚
故園寥落在長沙

薄命妾

阿嬌初失漢皇恩
舊賜羅衣亦罷熏
倚枕夜悲金屋雨
卷簾朝泣玉樓雲
宮前葉落鴛鴦瓦
架上塵生翡翠裙
龍騎不巡時漸久
長門空掩綠苔紋

獨不見

玉關一自有氛埃年少從軍竟未回
門外塵凝張樂榭水邊香滅按歌臺
窗殘夜月人何處簾卷春風燕復來
萬里寂寥音信絕寸心爭忍不成灰

交河塞下曲

交河冰薄日遲遲漢將思家感別離
塞北草生蘇武泣隴西雲起李陵悲
曉侵雉堞烏先覺春入關山雁獨知
何處疲兵心最苦夕陽樓上笛聲時

車遙遙

自從車馬出門朝，便入空房守寂寥。
玉枕夜殘魚信絕，金鈿秋盡雁書遙。
臉邊楚雨臨風落，頭上春雲向日銷。
芳草又衰還不至，碧天霜冷轉無憀。

早發潛水驛謁郎中員外

半牀秋月一聲雞，萬里行人費馬蹄。
青野霧銷凝晉洞，碧山煙散避秦溪。
樓臺稍辨烏城外，更漏微聞鶴柱西。
已是大仙憐後進，不應來向武陵迷。

贈漁者

不媿人間萬戶侯
子孫相繼老扁舟
往來南越諳鮫室
生長東吳識蜃樓
自為釣竿能遣悶
不因萱草解銷憂
羨君獨得逃名趣
身外無機任白頭

自嶺下泛鷁到清遠峽作

乘船浮鷁下韶水
絕境方知在嶺南
薜荔雨餘山自黛
蒹葭煙盡島如藍
旦遊蕭帝新松寺
夜宿嫦娥桂影潭
不為篋中書未獻
便來茲地結茅菴

題周瑜將軍廟

共說前生國步難，山川龍戰血漫漫。
交鋒魏帝旌旂退，委任君王社稷安。
庭際雨餘春草長，廟前風起晚光殘。
功勛碑碣今何在，不得當時一字看。

李羣玉二首

同鄭相并歌姬小飲因以贈

裙拖八幅湘江水，鬢聳巫山一片雲。
風格只應天上有，歌聲豈合世間聞。
胸前瑞雪燈斜照，眼底桃花酒半醺。

不是相如憐賦客肯教容易見文君

戲贈姬人賦尖字韻

骰子巡拋裏手拈無因得見玉纖纖但知謔道金釵落
圖向人前露指尖

顧非熊一首

秋日陝州道中作

孤客秋風裏驅車出陝西關山午時路村落一聲雞樹
勢標秦遠天形到岳低誰知我名姓來往自栖栖

袁不約

二首 向有病宮人一首查
重第七卷張祐作今刪去

長安夜遊

鳳城連夜九門通
帝女妃出漢宮
千乘寶車珠箔捲
萬條銀燭碧紗籠
歌聲緩過青樓月
香靄潛來紫陌風
長樂曉鐘歸騎後
遺簪墮珥滿街中

吳商浩

八首

巫峽聽猿

巴江猿嘯苦響入客舟中
孤枕破殘夢三聲隨曉風連

雲波澹澹和霧雨濛濛巫峽去家遠不堪魂斷空

秋塘晚望

鐘盡疎桐散曙鴉故山煙樹隔天涯西風一夜秋塘曉
零落幾多紅藕花

水樓感事

高柳蜚啼雨後秋年光空感淚如流滿湖菱荇東歸晚
閒倚南軒盡日愁

長安春贈友人

繁華堪泣帝城春，粉蝶青樓勢礙雲。
花對玉鉤簾外發，歌飄塵土路邊聞。
幾多遠客魂空斷，何處王孫酒自醺。
各有歸程千萬里，東風時節恨離羣。

宿山驛

文戰何堪功未圖，人驅羸馬指天衢。
露華凝夜渚，蓮盡月彩滿輪山。
驛孤岐路辛勤終日有，鄉關音信隔年無。
好同范蠡扁舟興，高挂一帆歸五湖。

一 塞上即事

身似流星跡似蓬
玉關孤望杳溟濛
寒沙萬里平鋪月
曉角一聲高捲風
戰士歿邊魂尚哭
單于獵處火猶紅
分明更想殘宵夢
故國依然到角東

北邙山

北邙山草又青青
今日銷魂事可明
綠酒醉來春未歇
白楊風起柳初晴
岡原旋葬松新長
年代無人闕半平
堪取金爐九還藥
不能隨夢向浮生

泊舟

身逐煙波魂自驚
木蘭舟上一帆輕
雲中有寺在何處
山底宿時聞磬聲

梁鎰一首

代征人妻喜夫還

征夫走馬發漁陽
少婦含嬌開洞房
十日廢臺還挂鏡
數年塵面再新妝
春風喜出今朝戶
明月虛眠昨夜牀
莫道幽閨音信隔
還衣總是舊時香

賀知章一首

詠柳

或刻柳枝詞

碧玉裝成一樹高
萬條垂下綠絲絛
不知細葉誰裁出
二月春風似剪刀

張蠟

四首

錢塘夜宴留別郡守

四方騷動一州安
夜列罇罍伴客懽
感粟調高山閣迥
蝦蟆更促海城寒
屏間佩響藏歌妓
幕外刀光立從官
沈醉不愁歸棹遠
曉帆吹上子陵灘

長安春望

明時不敢卧煙霞又見秦城換物華殘雪未銷雙鳳闕
新春已發五侯家甘貧祇擬長緘酒忍病猶期強採花
故國別來桑柘盡十年兵踐海西艖

敘懷

月裏路從何處上江邊身合幾時歸十年九陌寒風夜
夢歸蘆花絮客衣

題嘉陵驛

嘉陵路惡石和泥行到長亭日已西獨倚闌干正惆悵
海棠花裏鷓鴣啼

劉象 七首

春夜

幾處兵戈阻路岐憶山心切與山違時難何處披懷抱
日日斜空醉歸

又

一別杜陵歸未期祇憑魂夢接親知近來欲睡兼難睡

夜夜夜深聞子規

曉登迎春閣

未櫛憑欄眺錦城
煙籠萬井二江明
香風滿閣花盈戶
樹樹樹梢啼曉鶯

早春池亭獨遊

春意送殘臘
春晴融小洲
蒲茸纔簇岬
柳頰已遮樓
便有孟觴興
可攄羈旅愁
鳬鷺亦相狎
盡日戲清流

又

清流環綠篠清景媚虹橋鶯刷初遷羽莎拳擬折苗細
沙摧煖岼淑景動和颺倍憶同袍侶相歡倒一瓢

又

一瓢歡自足一日興偏多幽意人先賞疎叢蝶未過知
音新句苦窺沼醉顏酡萬慮從相擬今朝欲奈何

白髭

到處逢人求至藥幾回染了又成絲素絲易染髭難染
墨翟當時合泣髭

戴司顏 二首

江上雨

非不欲前去此情非自由
星辰照何處風雨送涼秋
寒鎖空江夢聲隨黃葉愁
蕭蕭猶未已早晚出蘋洲

塞上

空磧盡蒼茫沙腥古戰場
逢春多霰雪生計在牛羊冷
角吹鄉淚乾榆落夢牀
從來山水客誰謂到漁陽

一 沈彬 一首

秋日

秋含砧杵搥斜陽笛引西風顚氣涼
薜荔惹煙籠蟋蟀
菱荷翻雨潑鴛鴦當年酒賤何妨醉
今日時難不易狂
腸斷舊遊從一別潘安惆悵滿頭霜

李賀一首

七夕

別浦今朝暗羅帷午夜愁鵲辭穿線
月花入曝衣樓天
上分金鏡人間望玉鉤錢塘蘇小小
更值一年秋

嚴維 一首

秋夜船行

扁舟時屬暝月上有餘暉
海燕秋還去漁人夜不歸
中流何寂寂孤棹也依依
一點前村火誰家未掩扉

韓翃 一首

寒食

春城無處不飛花
寒食東風御柳斜
日暮漢宮傳蠟燭
青煙散入五侯家

熊鰾一首

早梅

江南近臘時已亞雪中枝一夜欲開盡百花猶未知人
情皆共惜天意不教遲莫訝無濃艷芳筵正好吹

張喬 三首

楊花落 一刻楊

巨源

北斗南迴春物老紅英落盡綠尚早韶風澹蕩無所依
偏惜垂楊作春好此時可憐楊柳花繁盈艷曳滿人家

金史已居卷三
卷九
人家女兒出羅幙，淨埽玉除待花落。
寶環纖手捧更飛，翠羽輕裙承不著。
歷歷瑤琴舞袖陳，飛紅拂黛憐玉人。
東園桃李芳已歇，猶有楊花嬌暮春。

送友人歸宜春

落花兼柳絮，無處不紛紛。
遠道空歸去，流鶯獨自聞。
野橋喧磴水，山郭入樓雲。
故里南陔曲，秋期更送君。

送進士許棠

離鄉積歲年，歸路遠依然。
夜火山頭市，春江樹杪船。
千

戈愁鬢改瘴癘喜家全何處營甘旨潮濤浸薄田

陳陶 一首

寄兵部任畹郎中

常思劒浦別清塵
荳蔻花紅十二春
崑玉已成廊廟器
澗松猶是薜蘿身
雖同橘柚依南土
終仰魁罡近北辰
好向明時薦遺逸
莫教千古弔靈均

張謂 一首

杜侍御送貢物戲贈

銅柱朱崖道路難
伏波橫海舊登壇
越人自貢珊瑚樹
漢使何勞解角冠
疲馬山中愁日晚
孤舟江上畏春寒
由來此貨稱難得
多恐君王不忍看

鄭常一首

寄邢逸人

羨君無外事
日與世情違
地僻人難到
溪深鳥自飛
儒衣荷葉老
野飯藥苗肥
疇昔江湖意
而今憶共歸

崔峒一首

題崇福寺禪院

僧家更無事埽地與焚香清磬度山翠閒雲來竹房身
心塵外遠歲月座中長向晚禪堂閉無人空夕陽

李洞 一首

喜鸞公自蜀歸

禁院閑生臺尋師到綠槐寺高猿看講鐘動鳥知齋埽
石月盈簾濾泉花滿師歸來逢聖節吟步上堯階

李端 一首

巫山高和皇甫拾遺

御覽集作
巫山高

巫山十二峯皆在碧虛中迴合雲藏日霏微雨帶風猿
聲寒過澗樹色暮連空愁向高唐去千秋見楚宮

江為一首

江行

越信隔年稀孤舟幾夢歸月寒花露重江晚水煙微峰
直帆相望沙空鳥自飛何時洞庭上春雨滿蓑衣

裴度一首

中書即事

有意效承平無功益聖明
灰心緣忍事霜鬢為論兵
道直身還在恩深命轉輕
鹽梅非擬議葵藿是平生
白日長懸照蒼蠅謾發聲
嵩陽舊田地終使謝歸耕

陳上美一首

咸陽懷古

山連河水碧氛氲瑞氣東移擁聖君
秦苑有花空笑日漢陵無主自侵雲
古槐堤上鶯千轉遠渚沙中鷺一群

賴與淵明同把菊煙郊西望夕陽曛

姚合 七首

遊宣義池亭

春入池亭好風光煖更鮮尋芳行不困逐勝坐還遷
細草亂如髮幽禽鳴似絃苔文翻古篆石色學秋天
花落能漂酒萍開解避船暫來猶愈疾久住合成仙
迸筍撐階起垂藤壓樹偏此生應借看自計買無錢

遊陽河岸

終日遊山困今朝始傍河尋芳愁路盡逢景畏人多鳥
語催沽酒魚來似聽歌醉時眠石上肢體自婆婆

邊詞

將軍作鎮古汧州水臙山春節氣柔清夜滿城絲管散
行人不信是邊頭

又

箭利弓調四鎮兵蕃人不敢近東行沿邊千里渾無事
唯見平安火入城

寄王度居士

顓頊王居士顓狂不稱時天公與貧病時輩復輕欺茅
屋隨年賃盤餐逐日移棄嫌官似夢珍重酒如師無竹
栽蘆看思山疊石為靜窗留客話古寺覓僧棋瘦馬寒
來死羸童餓得癡唯應尋阮籍心事遠相知

寄王玄伯

夜歸曉出滿衣塵轉覺才名帶累身莫覓舊來終日醉
世間盃酒屬開人

聞蟬

未秋吟便苦半咽半隨風
禪客心應亂愁人耳願聾
雨晴煙樹裏日晚古城中
遠思應難盡誰當與我同

楊牢一首

贈舍弟

秦雲蜀浪兩堪愁
爾養晨昏我遠憂
千里客心難寄夢
兩行鄉淚為君流
早驅風雨知龍聖
餓食魚蝦覺虎羞
袖裏鎔鋸光似水
丈夫不合等閑休

王昌齡 二首

出塞

秦時明月漢時關
萬里長征人未還
但使龍城飛將在
不教胡馬渡陰山

少年行

走馬遠相尋
西樓下夕陰
結交期一劍
留意贈千金
高閣歌聲遠
重關柳色深
夜闌須盡醉
莫負百年心

子鵲 二首

送唐大夫讓節歸山

或刻送唐中丞入道

年老功臣乞罷兵
玉階匍匐進雙旌
朱門鴛瓦為仙觀
白領狐裘出帝城
侍女休梳官樣髻
閭童新改道家名
到時浸髮春泉裏
猶夢紅樓簫管聲

送宮人入道

十載吹簫入漢宮
看修水殿種芙蓉
自傷白髮辭金屋
喜著黃衣向玉峰
解語老猿開曉戶
引雛飛鶴下高松
定知別後宮中伴
遙聽緱山半夜鐘

陳羽 一首

冬晚送友人使西蕃

驛使向天西巡羌復入
氏玉關晴有雪砂磧雨無泥
落淚軍中笛驚眠塞上難逢春
鄉思苦萬里草萋萋

僧貫休 三首

野田黃雀行

高樹風多吹爾巢落萼深葉煖
宜爾依泊莫近鴉類蛛網亦惡
飲野田之清水食野田之黃粟
深花中睡埽土

裏浴如此即全勝啄太倉之穀而穿人之屋

夜夜曲

蟋蟀切切風騷騷
芙蓉噴香蟾蜍高
孤燈耿耿征婦勞
更深撲落金錯刀

行路難

君不見山高海深人不測
古往今來轉清碧
淺近輕浮莫與交
地卑只解生荆棘
誰道黃金如糞土
張耳陳餘斷消息
行路難行路難君自看

僧尚顏 二首

秋夜吟

梧桐雨畔夜愁吟
抖擻衣裾蘚色侵
枉道一生無繫著
湘南山水別人尋

贈村公

袖衣木突此鄉尊
白盡鬚眉眼未昏
醉舞神筵隨鼓笛
閑歌聖代和兒孫
黍苗一頃垂秋日
茅棟三間映古原
也笑長安名利處
紅塵半是馬蹄翻

僧護國 一首

許州趙使君孩子

毛骨貴天生肌膚片玉明
見人空解笑弄物不知名
國器嗟猶小門風望益清
抱來芳樹下時引鳳雛聲

僧棲白 二首

八月十五夜月

一刻
中秋

尋常三五夜豈是不嬋娟
及至中秋半還勝別夜圓
清光凝有露皓色爽無煙
自古人皆望年來復一年

哭劉得仁

為愛詩名吟到此風魂雪魄去難招
直教桂子落墳上生得一枝冤始銷

僧無可二首

金州陪姚員外遊南池

柳暗清波漲衝萍復漱苔張筵白鳥起
埽岍使君來洲島秋應沒荷花晚盡開
高城吹角絕騶馭尚徘徊

夏日送田中丞赴蔡州

出守汝南城應多戀闕情地遙人久望風起旆初行楚
廟繁蟬斷淮田細雨生賞心知有處蔣宅古松平

僧清江一首

贈淮西賈兵馬使

破虜功成百戰場天書親拜漢中郎映門旌旆春風起
對客絃歌白日長階下鬪難花乍拆營南試馬柳初黃
由來吳楚多同調感激逢君共異鄉

僧法照一首

寄錢郎中

開門深樹裏閑足為經過
駟馬不為貴一僧誰奈何
藥苗家自有香飯乞時多
寄語嬋娟客將心向薜蘿

僧太易 二首

贈司空拾遺

侍臣何事辭雲陛江上微吟見雪花
望闕未承丹鳳詔開門空對楚人家
陳琳草奏才還在王粲登樓興尚賒
高館更容塵外客仍令歸路奉瑤華

宿天柱觀

石室初投宿仙翁喜暫容
花原隔水見洞府過山逢
泉湧階前地雲生戶外峰
中宵人自定不是欲降龍

僧惟審一首

賦得聞黃鳥啼

捲簾清夢後芳樹引流鶯
隔葉傳春意穿花送曉聲
未調雲路翼空負桂林情
莫盡關關興羈愁正厭生

僧滄浩一首

留別嘉興知己

一坐東林寺從來未下山不因尋長者無事到人間宿
雨愁為客寒禽散未還空懷舊山月童子誦經閑

僧皎然二首

酬崔侍御見贈

買得東山後逢君小隱時五湖遊未足柏署跡如遺儒
服何妨道禪心不廢詩一從居士說長破小乘疑

尋陸鴻漸不遇

移家雖帶郭野徑入桑麻近種籬邊菊秋來未著花扣
門無犬吠欲去問西家報道山中出歸時每日斜

僧無本 二首

行次漢上

習家池沼草萋萋嵐樹光中信馬蹄漢主廟前湘水碧
一聲風角夕陽低

馬嵬

長川幾處樹青青孤驛危樓對翠屏一自上皇惆悵後

至今來往馬蹄腥

才調集卷九

欽定四庫全書

才調集卷十目錄

張夫人二首

拜新月

拾得韋氏花鈿以詩寄贈

劉媛一首

長門怨

女道士李冶九首

從蕭叔子聽彈琴賦得三峽流泉歌

送韓揆之江西

相思怨

感興

恩命追入留別廣陵故人

八至

送閻二十六赴剡縣

寄朱放

得閻伯鈞書

劉雲 二首

有所思

婕妤怨

鮑君徽 一首

惜春花

崔仲容 二首

贈所思

贈歌姬

張文姬 二首

溪口雲

沙上鷺

女道士元淳 二首

寄洛中諸姊

秦中春望

蔣韞 二首

贈鄭女郎

古意

崔公遠

一首

獨夜詞

女道士魚玄機

九首

隔漢江寄子安

寓言

江陵愁望寄子安

寄子安

寄李億員外

送別

又

迎李近仁員外

賦得江邊樹

張窈窕 二首

寄故人

春思

張琰 二首

春詞

又

趙氏 二首

雜言寄杜羔

聞夫杜羔登第

程長文 三首

獄中書情上使君

銅雀臺

春閨怨

梁瓊
三首

昭君怨

銅雀臺

宿巫山寄遠人

廉氏
二首

懷遠

寄征人

薛濤

三首

送友人

題竹郎廟

柳絮

姚月華

二首

怨詩

又

裴羽仙 二首

邊將

又

劉瑤 三首

暗別離

古意曲

闔閭城懷古

妓常浩 二首

贈盧夫人

寄遠

葛鵲兒 一首

懷良人

薛媛 一首

寫真寄夫南楚材

盼盼 一首

燕子樓

崔鶯鶯一首

會張生

無名氏 三十七首

春

又

夏

秋

冬

雞頭

紅薔薇

斑竹簾

聽琴

石榴

秦家行

小蘇家

斑竹

宴李家宅

長信宮

驪山感懷

聽唱鷓鴣

遊朱坡故少保杜公林亭

留贈偃師主人

長門

客有新豐館題怨別之詞因詰傳吏盡得其實
偶作四韻嘲之

經漢武泉

雜詩

又

又

又

又

又

又

又

雜詩

又

天竺國胡僧水晶念珠

白雪歌

琵琶

傷哉行

欽定四庫全書

才調集卷十

唐 韋穀 撰

張夫人

二首 戶部侍郎吉中孚妻

拜新月

拜新月拜月出堂前暗魄初籠桂虛弓未引弦拜新月
拜月妝樓上鸞鏡未安臺蛾眉已相向拜新月拜月不
勝情庭前風露清月臨人自老人望月長生東家阿母
亦拜月一拜一悲聲斷絕昔年拜月逞容輝如今拜月

雙淚垂回看衆女拜新月却憶紅閨年少時

拾得韋氏花鈿以詩寄贈

今朝妝閣前拾得舊花鈿粉污痕猶在塵侵色尚鮮曾
經纖手裏拈向翠眉邊能助千金笑如何忍棄捐

劉媛一首

長門怨

雨滴梧桐秋夜長愁心和雨到昭陽淚痕不與君恩斷
拭却千行更萬行

女道士李冶

九首
字李蘭

從蕭叔子聽彈琴賦得三峽流泉歌

中興集
小異

妾家本住巫山雲巫山流泉常自聞
玉琴彈出轉寥寞
俱是當時夢裏聽
三峽迢迢幾千里
一時流入幽閨裏
巨石崩崖指下生
飛泉走浪絃中起
初疑憤怒含雷風
又似鳴咽流不通
迴湍曲瀨勢將盡
時復滴瀝平沙中
憶昔阮公為此曲
能使仲容聽不足
一彈既罷復一彈
願作流泉鎮相續

送韓揆之江西

或刻送閻伯均往江
州中興集小異

相招折楊柳別恨轉依依
萬里西江水孤舟何處歸
湓城潮不到夏口信應稀
唯有衡陽雁年年來去飛

相思怨

人道海水深不抵相思半
海水尚有涯相思眇無畔
攜琴上酒樓樓虛月華滿
彈著相思曲絃腸一時斷

感興

朝雲暮雨鎮相隨去雁來人有返期
玉枕祇知長下淚

銀燈空照不眠時
仰看明月翻含意
俯盼流波欲寄詞
却憶初聞鳳樓曲
教人寂寞復相思

恩命追入留別廣陵故人

無才多病分龍鍾
不料虛名達九重
仰愧彈冠上華髮
多慚拂鏡理衰容
馳心北闕隨芳草
極目南山望舊峰
桂樹不能留野客
沙鷗出浦謾相逢

八至

至近至遠東西至
至深至淺清濁至
至高至明日月至
至親至

疎夫妻

送閻二十六赴剡縣

流水閭門外孤舟日復西
離情遍芳草無處不萋萋
妾夢經吳苑君行到剡溪
歸來重相訪莫學阮郎迷

寄朱放

中興集同

望水試登山山高湖又闊
相思無曉夕相望經年月
鬱山木青綿綿野花發
別後無限情相逢一時說

得閻伯鈞書

情來對鏡懶梳頭
莫雨蕭蕭庭樹秋
莫怪闌干垂玉箸
只緣惆悵對銀鈎

劉雲 二首

有所思

朝亦有所思
莫亦有所思
登樓望君處
靄靄蕭蕭關道掩
淚向浮雲誰知
妾懷抱玉井
蒼苔青院深
梧桐落盡無人歸

婕妤怨

君恩不可見妾豈如秋扇秋扇尚有時妾身永微賤莫
言朝花不復落嬌容幾奪昭陽殿

鮑君徽 一首

惜春花

或刻惜
花吟

枝上花花下人可憐顏色俱青春昨日看花花灼灼今
日看花花欲落不如盡此花下歡莫待春風總吹却鶯
歌蝶舞媚韶光紅爐煑茗松花香妝成吟態恣遊樂獨
把花枝歸洞房

崔仲容 二首

贈所思

所居幸接鄰相見不相親一似雲間月何殊鏡裏人
丹誠空有恨腸斷不禁春願作梁間燕無由變此身

贈歌姬

水剪雙眸霧剪衣當筵一曲媚春暉
瀟湘夜瑟怨猶在巫峽曉雲愁不晞
皓齒乍分寒玉細黛眉輕蹙遠山微
渭陽朝雨休重唱滿眼陽關客未歸

張文姬

二首
參軍妻

鮑

溪口雲

溶溶溪口雲，纔向溪中吐。不復歸溪中，還作溪中雨。

沙上鷺

沙頭一水禽，鼓翼揚清音。只待高風便，非無雲漢心。

女道士元淳二首

寄洛中諸姊

舊國經年別，關河萬里思。題詩憑雁翼，望月想蛾眉。白

髮愁偏覺歸心夢獨知誰堪離亂處掩淚向南枝

秦中春望

鳳樓春望好宮闕一重重上苑雨中樹終南霽後峰落
花行處徧佳氣晚來濃喜見休明代霓裳躡道蹤

蔣馥

二首一作蘊字馥

贈鄭女郎

或刻鄭氏妹

豔陽灼灼河洛神珠簾繡戶青樓春能彈箜篌弄纖指
愁殺門前少年子笑開一面紅粉妝東園幾樹桃花死

朝理曲莫理曲獨坐窗前一片玉行也嬌坐也嬌見之
令人魂魄銷堂前錦褥紅地鑪綠沈香榼傾屠蘇解佩
時時歇歌管芙蓉帳裏蘭麝滿晚起羅衣香不斷滅燭
每嫌秋夜短

古意

昨夜巫山中失却陽臺女朝來香閣裏獨伴楚王語

崔公遠一首

獨夜詞

晴天霜落寒風急錦帳羅幃羞更入秦箏不復續斷絃
回身掩淚挑燈立

女道士魚玄機

九首

隔漢江寄子安

江南江北愁望相思相憶空吟鴛鴦煖卧沙浦鸛鵒閑
飛橘林煙裏歌聲隱隱渡頭月色沈沈含情咫尺千里
況聽家家遠砧

寓言

紅桃處處春色碧柳家家月明樓上新妝待夜閨中獨
坐含情芙蓉葉下魚戲蟬蛸天邊雀聲人世悲歡一夢
如何得作雙成

江陵愁望寄子安

楓葉千枝復萬枝江橋掩映暮帆遲憶君心似西江水
日夜東流無歇時

寄子安

醉別千卮不浣愁離腸百結解無憂蕙蘭銷歇歸春圃

楊柳東西絆客舟聚散已愁雲不定
恩情須學水長流
有花時節知難遇未肯厭厭醉玉樓

寄李億員外

集作贈
鄰女

羞日遮紅袖愁春嬾起妝易求無價寶難得有心郎
枕上潛垂淚花間暗斷腸自能窺宋玉何必恨王昌

送別

層城幾夜愜心期不料仙鄉有別離
睡覺莫言雲去處
殘燈一盞野蛾飛

又

水柔逐器知難定雲出無心肯再歸惆悵春風楚江莫
鴛鴦一隻失羣飛

迎李近仁員外

今日喜時聞喜鵲昨宵燈下拜燈花焚香出戶迎潘岳
不羨牽牛織女家

賦得江邊樹

草色迷荒岼煙姿入遠樓葉鋪秋水面花落釣人頭根

老藏魚窟枝低繫客舟
蕭蕭風雨夜驚夢復添愁

張窈窕 二首

寄故人

澹澹春風花落時
不堪愁坐更相思
無金可買長門賦
有恨空吟團扇詩

春思

門前梅柳爛春輝
閑妾深閨繡舞衣
雙燕不知腸欲斷
銜泥故故傍人飛

張琰二首

春詞

垂柳鳴黃鸝
關關若求友
春情不可耐
愁殺閨中婦
日莫登高樓
誰憐小垂手

又

昨日桃花飛
今朝梨花吐
春色能幾時
那堪此愁緒
蕩子遊不歸
春來淚如雨

趙氏二首

雜言寄杜羔

君從淮海遊再過蘭杜秋歸來未須臾又欲向梁州梁
州秦嶺西棧道與雲齊羌蠻萬餘落矛戟自高低已念
寡儔侶復慮勞攀躋丈夫重志氣兒女空悲啼臨邛滯
遊地肯顧濁水泥人生賦命有厚薄君但遨遊我寂寞
聞夫杜羔登第

長安此去無多地鬱鬱蔥蔥佳氣浮良人得意正年少
今夜醉眠何處樓

程長文 三首

獄中書情上使君

妾家本住鄱陽曲一片真心比孤竹當年二八盛容儀
紅牋草隸恰如飛盡日閑窗刺繡坐有時極浦採蓮歸
誰道居貧守都邑幽閨寂寞無人入海燕朝歸衾枕寒
山花夜落階墀濕強暴之男何所為手持白刃向簾幃
一命任從刀下死千金豈受暗中欺我心匪石情難轉
志奪秋霜意不移血濺羅衣終不恨瘡粘錦袖亦何辭

縣僚曾未知情緒即便教人繫囹圄朱唇滴瀝獨銜冤
玉筋闌干歎非所十月寒更堪思人一聞擊柝一傷神
高髻不梳雲已散蛾眉罷埽月仍新三尺嚴章難可越
百年心事向誰說但看洗雪出圜扉始信白圭無玷缺

銅雀臺

君王去後行人絕簫箏不響歌喉咽雄劍無威光彩沈
寶琴零落金星滅玉階寂寞墜秋露月照當時歌舞處
當時歌舞人不回化為今日西陵灰

春閨怨

綺陌香飄柳如線時光瞬息驚流電良人何處事功名
十載相思不相見

梁瓊

三首

昭君怨

自古有和親貽灾到妾身朔風嘶去馬漢月出行輪衣
薄狼山雪妝成鴈塞春迴看父母國生死畢沙塵

銅雀臺

歌扇向陵開，齊行奠玉盃。
舞時飛燕列，夢裏片雲來。
月色空餘恨，松聲莫更哀。
誰憐未死妾，掩袂下銅臺。

宿巫山遠寄人

巫山雲巫山雨，朝雲暮雨無定所。
南峰忽暗北峰晴，空裏仙人語笑聲。
曾侍荆王枕席處，直至如今如有靈。
春風澹澹白雲間，驚湍流水響千山。
一夜此中對明月，憶得此中與君別。
感物情懷如舊時，君今渺渺在天涯。
曉看襟上淚，流處點點血痕猶在衣。

廉氏二首

懷遠

隙塵何微微朝夕通其輝人生各有託君去獨不歸青
林有蟬響赤日無鳥飛徘徊東南望雙淚空沾衣

寄征人

淒淒北風吹鴛被娟娟西月生蛾眉誰知獨夜相思處
淚滴寒塘蕙草時

薛濤三首

送友人

水國蒹葭夜有霜，月寒山色共蒼蒼。
誰言千里自今夕，離夢杳如關塞長。

題竹郎廟

竹郎廟前多古木，夕陽沈沈山更綠。
何處江村有笛聲，聲聲盡是迎郎曲。

柳絮

二月楊花輕復微，春風搖蕩惹人衣。
他家本是無情物，

一向南飛又北飛

姚月華 二首

怨詩

春水悠悠春草綠對此思君淚相續羞將離恨向東風
理盡秦箏不成曲

又

與君形影分胡越玉枕終年對離別登臺北望煙雨深
迴身泣向寥天月

裴羽仙

二首 其夫征匈奴輕行入為利
鹿生擒帳下自爾一往音信斷絕

邊將

風卷平沙日欲曛
狼煙遙認雁飛羣
李陵一戰無歸日
望斷遙天哭塞塵

又

良人平昔逐蕃渾
力戰輕行出塞門
從此不歸成萬古
空留賤妾怨黃昏

劉瑤

三首

暗別離

槐花結子桐葉焦單飛越鳥啼青霄翠軒輾雲輕遙遙
燕脂淚迸紅線條瑤草歇芳心耿耿玉佩無聲畫屏冷
朱絃暗斷不見人風動花枝月中影青鸞脈脈西飛去
海闊天高不知處

古意曲

梧桐階下月團團洞房如水秋夜闌吳刀剪破機頭錦
茱萸花墜相思枕綠窗寂寞背燈時暗數寒更不成寢

闔閭城懷古

五湖春水接遙天
國破君亡不記年
唯有妖娥曾舞處
古臺寂寞起愁煙

常浩

二首

贈盧夫人

佳人惜顏色
恐逐芳菲歇
日莫出畫堂
下階拜新月
拜月如有詞
傍人那得知
歸來投玉枕
始覺淚痕垂

寄遠

年年二月時十年期別期春風不知信軒蓋獨遲遲今
日無端捲珠箔始見庭花復零落人心一往不復歸歲
月來時未嘗錯可憐熒熒玉鏡臺塵飛幕幕幾時開却
念容華非惜好畫眉猶自待君來

葛鵲兒一首

懷良人

蓬鬢荆釵世所稀布裙猶是嫁時衣胡麻好種無人種
正是歸時不見歸

薛媛一首

寫真寄夫南楚材

欲下丹青筆先拈寶鏡端已驚顏索寞漸覺鬢凋殘淚
眼描將易愁腸寫出難恐君渾忘却時展畫圖看

盼盼一首
建封妾張

燕子樓

樓上殘燈伴曉霜獨眠人起合歡牀相思一夜情多少
地角天涯不是長

崔鶯鶯一首

會張生

或刻月明
三五夜

待月西廂下迎風戶半開拂牆花影動疑是玉人來

無名氏 三十七首

春

裊裊東風吹水國金鴉影暖南山北蒲抽小劍割湘波
柳拂長眉舞春色白銅堤下煙蒼蒼林端細蕊參差香
綠桑枝下見桃葉迴看青雲空斷腸

又

烏足遲遲日宮裏
天門擊鼓龍蛇起
風師剪翠換枯條
青帝按藍染江水
蜂蝶繽紛抱香蕊
錦鱗跳擲紅雲尾
繡衣白馬不歸來
雙成倚檻春心醉

夏

赤帝旗迎火雲起
南山石裂吳牛死
繡楹夜夜箔蝦鬚
象榻重重簾湘水
彤彤日脚燒冰井
古陌塵飛野煙靜
漢帝高堂汗若珠
班姬明月無停影

秋

月色驅秋下穹昊
梁間燕語辭巢蚤
古苔凝紫貼瑤階
露槿啼紅墮江草
越客羈魂挂長道
西風欲揭南山倒
粉娥恨骨不勝衣
映門楚碧蟬聲老

冬

蒼茫枯磧陰雲滿
古木號空晝光短
雲擁三峰嶽色低
冰堅九曲河聲斷
浩汗霜風刮天地
溫泉火井無生意
澤國龍蛇凍不伸
南山瘦柏銷殘翠

雞頭

湖浪參差疊寒玉水仙曉展鉢盤綠淡黃根老栗皺圓
染青刺短金罌熟紫羅小囊光緊蹙一掬真珠藏蛭腹
鼓鼓引背傍蓮洲滿川恐作天雞哭

紅薔薇

九天碎霞明澤國造化工夫潛剪刻淺碧眉長約細枝
深紅刺短鉤春色晴日當樓曉香歇錦帶盤空欲成結
謝豹聲催麥隴秋春風吹落猩猩血

斑竹簟

龍鱗滿牀波浪濕血光點點湘娥泣一片晴霞凍不飛
深沈盡訝鮫人立百朶排花蜀纈明珊瑚枕滑葛衣輕
閑窗獨卧曉不起冷浸羈魂錦江裏

聽琴

六律鏗鏘間宮徵伶倫寫入梧桐尾七條瘦玉叩寒星
萬派流泉哭纖指空山雨脚隨雲起古木燈青嘯山鬼
田文墮淚曲未終子規啼血哀猿死

石榴

蟬嘯秋雲槐葉齊石榴香老庭枝低流霞色染紫嬰栗
黃蠟紙苞紅瓠犀玉刻冰壺含露濕端斑似帶湘娥泣
蕭娘初嫁嗜甘酸嚼破水精千萬粒

秦家行

彗孛飛光照天地九天瓦裂屯冤氣鬼哭聲聲怨趙高
宮花滴盡扶蘇淚禍起蕭牆不知戢羽書催築長城急
劍上忠臣血未乾沛公已向函關入

小蘇家

雙月謳謳輾秋碧細風斜掩神仙宅
麥門冬長馬鬣青
茱萸蕊綻蠅頭赤流蘇斗帳懸高壁
綵鳳盤龍繳香額
堂內月娥橫剪波倚門腸斷蝦鬚隔

斑竹

濃綠疎莖遶湘水春風抽出蛟龍尾
色抱霜花粉黛光
枝撐蜀錦紅霞起交戛敲敲無俗聲
滿林風曳刀槍橫
般痕苦雨洗不落猶帶湘娥淚
血腥娟娜梢頭埽秋月

影穿林下疑殘雪
我今慙愧子猷心
解愛此君名不減
宴李家宅

畫屏深掩瑞雲光
羅綺花飛白玉堂
銀榼酒傾魚尾倒
金爐灰滿爇心香
輕搖綠水青蛾飲
亂觸紅絲皓腕狂
今日恩榮許同聽
不辭沈醉一千觴

長信宮

細草侵階亂碧鮮
宮門深鎖綠楊天
珠簾欲捲臺秋水
羅幌微開動冷煙
風引漏聲過枕上
月遷花影到窗前

獨挑殘焰魂堪斷却恨青蛾誤少年

驪山感懷

武帝尋仙駕海遊禁門高閉水空流深宮帶日年年色
翠柏凝煙夜夜愁鸞鳳影沈歸萬古歌鐘聲斷夢千秋
晚來惆悵無人會雲雨能飛傍玉樓

聽唱鷓鴣

金谷歌傳第一流鷓鴣清怨碧雲愁夜來省得曾聞處
萬里月明湘水流

遊朱坡故少保杜公林亭

杜陵池館洛城東，孤島迴汀路不窮。
高岫乍疑三峽近，遠波初似五湖通。
梧桐葉暗蕭蕭雨，菱荇花香澹澹風。
還有昔時巢燕在，飛來飛去畫堂空。

留贈偃師主人

孤城漏未殘，徒侶拂征鞍。
洛北去愁遠，淮南歸夢闌。
曉燈迴壁暗，晴雪卷簾寒。
更盡主人酒，出門行路難。

長門

悵望黃金屋恩衰似越逃花生針眼刺月送剪腸刀地
近歡娛遠天低雨露高時看迴輦處淚臉濕天桃

客有新豐館題怨別之詞因詰傳吏盡得其實

偶作四韻嘲之

春風白馬紫絲韉正值蠶眠未採桑五夜有心隨暮雨
百年無節待秋霜重尋繡帶朱藤合更認羅裙碧草長
為報西遊減離恨阮郎纔去嫁劉郎

經漢武泉

芙蓉池苑起清秋漢武泉聲落御溝他日江山映蓬鬢
二年楊柳別漁舟竹間駐馬題詩去物外何人識醉遊
盡把歸心付紅葉晚來隨水向東流

雜詩

近寒食雨草萋萋著麥苗風柳映堤早是有家歸未得
杜鵑休向耳邊啼

又

春光冉冉歸何處更向尊前把一盃盡日問花花不語

為誰零落為誰開

又

水紋珍簟思悠悠千里佳期一夕休從此無心愛良夜
任他明月下西樓

又

數日相隨兩不忘郎心如妾妾如郎出門便是東西路
把取紅牋各斷腸

又

無定河邊莫角聲
赫連臺畔旅人情
函關歸路千餘里
一夕秋風白髮生

又

花落長川草色青
莫山重疊雨冥冥
逢春便覺飄蓬苦
今日分飛一涕零

又

洛陽才子鄰簫恨
湘水佳人錦瑟愁
今昔兩成惆悵事
臨邛春盡莫江流

又

浙江輕浪去悠悠望海樓吹望海愁莫怪鄉心隨魄斷
十年為客在他州

雜詩

二篇見劉夢得集中

鸞飛遠樹遊何處鳳得新巢有去心紅粉尚留香幕幕
碧雲初斷信沈沈卹堪點汚沈泥玉猶自經營買笑金
從此山頭似人石丈夫形狀淚痕深

又

折釵破鏡兩無緣
魚在深潭月在天
得意紫鸞辭舞鏡
墮松青鳥斷銜牋
金瓶永覆難收水
玉軫長拋不續絃
若到蘼蕪山下過
空將狂淚滴黃泉

天竺國胡僧水晶念珠

天竺胡僧踏雲立
紅精素貫鮫人泣
細影疑隨爛火銷
圓光恐滴袈裟濕
夜梵西天千佛聲
指輪次第驅寒星
若非葉下滴秋露
則是井底圓春冰
淒清妙麗應難竝
眼界真如意珠靜
碧蓮花下獨提攜
堅潔何如幻泡影

白雪歌

皇穹何處飛瓊屑散下人間作春雪五花馬踏白雲衢
七香車碾瑤墀月蘇岳乳洞擁山家澗藤古栗盤銀蛇
寒郊複疊鋪柳絮古磧爛漫吹蘆花流泉不下孤汀咽
斷臂老猿聲欲絕鳥啄冰潭玉鏡開風敲簷溜水晶折
拂戶初疑粉蝶飛看山又訝白鷗歸孫康凍死讀書闌
火井不煖溫泉微

琵琶

粉胸繡臆誰家女香撥星星共春語七盤嶺上走鸞鈴
十二峰頭弄雲雨千悲萬恨四五絃絃中甲馬聲駢闐
山僧撲破瑠璃鉢壯士擊折珊瑚鞭珊瑚鞭折聲交戛
玉盤傾瀉真珠滑海神驅趁夜濤回江娥感踏春冰裂
滿坐紅妝盡淚垂望鄉之客不勝悲曲終調絕忽飛去
洞庭月落孤雲歸

傷哉行

兔走鳥飛不相見人事依稀速如電王母天桃一度開

玉樓紅粉千回變車馳馬走咸陽道石家舊宅空荒草
秋雨無情不惜花芙蓉一一驚顛倒勸君莫謾栽荆棘
秦皇虛費驅山力英風一去更無言白骨沈埋莫山碧



才調集卷十